



御選元詩卷第五十五目錄

七言律詩十四

錢惟善二十九首

張昱三十八首

王逢十六首

戴良七首

顧瑛二十八首

倪瓚四十五首

行遊六言
卷三

御選元詩卷第五十五

七言律詩十四

錢惟善

送曹克明負外之湖廣省

錢塘西望武昌城，天際飛艫幾日程。
三峽波濤下江漢，九疑雲霧接巫衡。
笑談落落蕭曹佐，登覽蒼蒼屈宋情。
更把文風變丹徼，不須銅柱紀南征。

早發葑門得風直抵阜林泊

白龍廟前風浪生，扁舟初離闔閭城。
嬋娟霜月鴈千里，顛倒衣裳雞五更。
櫓咎漁歌江入夢，帆迎野色樹移程。
葦間何限秋蕭瑟，愁絕胡笳出塞聲。

述懷

倦遊湖海十年餘人物如雲想國初貞觀名臣重房杜
建安才子數應徐聞雞起舞關河壯射虎歸來事業疎
便欲巢松尋五老短檠依舊滿牀書

懷陳子敬王子仁

倦遊年少滯江南憂患驚心百不堪韶海有人遺白葛
洞庭無客寄黃甘涼風拂袵聽喉嚨夜雨移鐙覆手談
寂莫歲寒梅共我月明索笑碧雲檐

題廣微天師昇龍圖

噓氣乘雲薄太清墨卿靈怪硯池腥波濤光彩失雙劍
風雨晦冥驅六丁朱火騰空超碧落翠鱗垂水捲滄溟

真人上挾飛仙去安得攀髯過洞庭

奉和太常博士柳公浦陽十詠詩

錄三首

龍峰孤塔

巋然特立梵王宮梯級惟容鳥道通翠壁雲綃紅劫火
鐵檐鈴雨落秋風高標插漢蒼龍左倒影橫江白鶴東
何日捫蘿尋勝迹不愁千里目難窮

南江夕照

目盡江南送夕陽空明直下接魚梁千重雲岫連平遠
五色霜林映渺茫孤鷺倒飛天上下長虹高卧水中央
白雲紅稻多秋思付與詩翁了醉鄉

東嶺秋陰

青山失色暗丹楓
廣野平林杳靄中
半嶺無雲時慘淡
尺天不雨亦空濛
冥冥南向藏元豹
漠漠東開見白鴻
高處夕佳難攬結
埽除陰翳待雄風

述懷寄光遠并簡城南諸友二首

野人無事久忘機
肯信紛華有是非
花信欲闌鶯百轉
麥芒初長雉雙飛
書中歲月仍爲客
枕上江山屢夢歸
時復思君倚深樹
不知殘雨溼春衣

青青草色接平蕪
翠涌千峰入座隅
戴勝晨呼採桑女
於菟夜警牧豬奴
羽觴洛水聞修禊
單袷溫泉想舞雩
欲泛蘭舟過春渚
一樓煙雨似西湖

送李德夫福建運司書吏

吳柳初黃越樹丹照人秋色送征鞍雲隨親舍回揚子
山引郵城入候官萬石鹽饒輸海賦兩潮魚上助盤餐
武夷我有南遊約欲借扶搖駕羽翰

九月晦日張機仲同宿明慶亨會堂上人房是
夜讀羅昭諫詩

寶坊金碧近閭閻閣道沈沈警夜嚴萬石華鯨驚海獸
四檐鐵鳳語蜚廉傷時我豈同昭諫覓句師能及道潛
一榻茶煙清夢熟因思松瀑灑冰簾

正月十六日遊湖上

東風杖屨偶相從試傍新隄覓舊蹤花竹園池通一徑
金銀樓閣倚千峰林煙日午青先暝湖水天寒綠未濃

賣酒壚頭人似玉抱琴時復醉臨邛

送李可度

暫駕仙舟絕海濤未應歸夢又金鰲漢家長者爲廷尉
江左參軍辟掾曹十月蛟鼉淮浪靜九天鷹隼朔雲高
匡時有用須公等莫遣吳霜點髯毛

送陳衆仲之官翰林應奉

畫鷁齊飛發棹謳泛江幾日過揚州曉雲最白梅花驛
春雨初香杜若洲一代文章關氣運十年館閣擅風流
綠波草色連天遠不是尋常送別愁

和季文山齋早春二首

方壺元不離人間倚徧東風十二闌煙雨樓臺春似畫

水雲窗戶晝生寒
遙知洗鼎煎茶待
定許敲門借竹看
醉後石橋花爛漫
翠禽啁哳在檐端

落梅風細小窗寒
石上餘香點點斑
不惜壺觴千日醉
只愁庭館一春閒
澗雲生白元非雨
江樹排青更有山
攜取畫圖溪上去
鶴聲應到夢魂間

晚雨過白塔

宋宮傳是唐朝寺
白塔崔嵬寢殿前
夏雨染成千樹綠
暮嵐散作一江煙
蒼苔門外銅鋪暗
細柳營中畫角傳
寂莫葫蘆宮井畔
野人拾得舊金鈿

送王舉之入京就簡樵谷

短衣匹馬佩吳鉤
欲寫關河萬古愁
射鴈秋風高紫塞

聽鶯春色滿皇州黃塵驛路三千里白玉京城十二樓
無酒送君懷抱惡過江爲覓故人舟

題魯彥康所藏范寬山水手軸

看雲終日坐蒼苔溪上千峰紫翠堆種竹人家臨水住
抱琴客子過橋來欲書盤谷先生序更把潯陽處士杯
他日卜居能似畫草堂題作小蓬萊

雨後登吳山過城隍廟眺望

偶向吳山高處望淒涼猶自覺繁華百年香火祠神宇
二月笙歌賣酒家渺渺風帆來海島冥冥江樹接煙沙
倚闌貪看西湖上古木荒城日又斜

漁村

丙穴魚來江盡頭元真卜築更深幽對門燈火三家市
何處煙波萬里舟明月竹枝揚子夜西風木葉洞庭秋
棹歌一曲閑來往指點儂家鸚鵡洲

一峰晴雪

石名

醉倚崔嵬夢剡溪覺來翻訝衆峰低孤標想見天山北
萬里飛來蜀國西每怪珠光含霽月不知玉氣吐晴霓
風流欲喚坡仙起雪浪齋中共品題

送賈元英之照潭

照潭遙望九華山弓馬蕭蕭日暮還夢裏無題惟寄內
胸中有策欲平蠻落花閉戶眠黃犬明月開籠放白鵬
絳灌何曾輕賈誼早隨鵷鷺入朝班

清逸齋

神仙官府曾爲吏一日乘風即掉頭太白豈惟凌鮑謝
元卿只合友羊求門前種樹雲連屋湖上聽潮月滿樓
遙憶五經名隱地義睂高聳蜀天秋

杏花

等鶯期燕引遊蜂知隔垂楊第幾重壇近緇帷忘晝永
宮催羯鼓助春濃絳煙輕潤香鬢衰紅雪乾團粉淚鎔
寂寞曲江人不見貞元朝士憶時雍

送魏好義尹分水賦十六瀨

東來衆水發新安歷歷桐川第二灘萬壘冷雲藏亂石
一江春雨落驚湍青山隔樹連漁浦白鳥迎潮入釣壇

地占客星高隱處時飛鳬舄上巖端

次陳君瑞遊鳳凰山光明寺

左瞻劒戟龍門並上脫冠巾鳳髻雙齋近木魚鳴晝廡
行遲松鼠落晴窗雲深不覺山藏寺溪漲應隨雨到江
未識此中真樂地三生先喜俗緣降

喜白髮爲陳師復賦

勲業無成散似樗青銅欣見二毛初中郎興動秋風起
太傅詩成壯歲餘皎皎易汙時一沐星星難染漫千梳
等閒得此無情物自有忘憂滿架書

張昱

五府驛代楊左丞留題

免胄日趨丞相府解鞍夜宿五侯家玉杯行酒聽春雨
銀燭照人如晚霞受命敢忘軍旅事撫時又過掖垣花
漢家未可輕韓信尚要生擒李左車

陪宴相府得芍藥花有感賦

醉吐車茵愧不才馬前蝴蝶趁花回玉瓶盛露扶春起
錦帳圍鐙照夜開垂白敢思溱洧贈欹紅還是廟廊栽
揚州何遜空才思惟對高寒詠閣梅

退居湖上投贈楊左丞二首

樓外湖光白渺茫樓中少婦試新妝行年將近半百歲
大醉豈能千萬場翠織舞裙飛蛺蝶白描歌扇睡鴛鴦
垂楊滿院無人到芍藥花開日正長

且觀神女爲行雨莫問郎官應列星芳草到門無俗駕
好山終日在湖亭白鷗共戲荷葉小黃鳥亂啼楊柳青
肯信曲闌干外立晚涼吹得酒初醒

惆悵五首

三山夢斷綵雲空幾把長牋賦惱公畫閣小杯鸚鵡綠
玉盤纖手荔枝紅春衫汗浥薔薇露夜帳香回茉莉風
惆悵近來江海上却將鞍馬學從戎

畫船湖上載春行日日花香扇底生蘇小樓前看洗馬
水仙祠畔坐聞鶯碧桃紅杏渾相識紫燕黃蜂俱有情
惆悵繁華成逝水盡歸江海作潮聲

惆悵當年使酒來娼樓紅粉夜相催可憐明月三分在

不見瓊花半朵開誰復醉翁堂下柳更堪從事閣中梅
揚州一片青青草誰信春來無鴈回

惆悵雄藩海上遊武昌佳氣接神州東風歸思王孫草
北渚愁生帝子洲楚國江山真可惜劉家豚犬亦何羞
不須更問中原事官柳新栽過戟樓

至今惆悵在東城結伴看花取次行輦道駐車招飲妓
宮牆回馬聽流鶯星河織女從離別海水蓬萊見淺清
不有酒船三萬斛此生懷抱望誰傾

過楊忠愍公軍府留題

總是田家門下客誰於軍府若爲情林花滿樹鶯都散
雨水平池草自生街上相逢驚故吏馬前迎拜泣殘兵